



# Kuz Kamankiya Charape Izapanimama Kandozshini Tarashini

ASOCIACIONA CHARAPI TARAHAZTAKANA ANU

Wanasir Tarawzom Yartarana Anu .....	3
Charape Izapanimam Ashkana Anu .....	4
1. Charap Ngichtamam Yarkana Anu .....	4
2. Charap Wayangich Tatsumimam Mazache Tachukana Anu .....	5
3. Charap Gillichtakchu Yakana Anu .....	6
4. Wayangche Tatsumku Anu .....	7
5. Wayangche Tatsumiramchu Ksutkana Ano .....	8
6. Ituwaramchu Chinuku Ano .....	8
7. Tawar Kajonam Tinayru Anush Wakiya .....	9
8. Charape Wip Musash Kapetkana Izapanimama Anu .....	10
9. Tupaxanxakana Anu .....	10
10. Iwaparamchu Napku Ano .....	11



# WANASIR TARAWZOM YARTARANA ANU

Comunidad Musa Karushanung mus misha kung zapancha tarsha, kung tsapo poksha, kach kapung tariya, tarpari 3.8 millones de hectáreas, ashiriya RAMSAR tusin isamashinllinaya, maachi zapang tariya, kapungcha wanasiri tashinllinaya.

Nish Piruanash 14 charap min min ashiru mang tariya, itaru anush tuchpamsha wanasir taririya tupaxanxamama (MINAM, 2014; Ferronato & Morales, 2012).

La legislación nacional DS N° 004-2014-MINAGRI atcha, na ini charap kachingeshincha, ashirucha tupaxanxamam wipa zandkus tachtaru autoridadatsima mashangints tasa (ARFFS) duniya ashiru SERNANP ayu atu wanasiritamta tupaxanxamama, itaru anom siya planaris iwapam payurus an kamirnamam tariya.

Kandoz federacionari FECONAKADIP, ORKAMUKADIP, ORKASEC Y ORKAQUEPREDIP y comunidadsha, misha kizsha Musa Karushuch (taricayeras), masharanganaya istanda tusina Profonanpetsi tanischimama el PLAN DE MANEJO DE *Podocnemis unifilis* "TARICAYA", EN EL SECTOR DE LA COMUNIDAD DE MUSAKARUSHA, RIO PASTAZA, ushtisin ayu taranganaya watam kizpur wanasiriwa tusina (ashiriya nee tarawzó kizcha pi sheni tayashinllinaya tusin istaranganaya, watam pukirewawa atu, misha watam tupaxanxantamsinawa taranganaya).

Ashiriya nda ini tarawazu charape chinukana an tsipamam, ayu wnasircha tusin apruebashtaranganaya el Plan de Manejo de fauna *Podocnemis unifilis* "Taricaya" mediante Resolución Jefatural N° 013-2021-GRL-GGR-GRDFFS-ODPDM, ne tarwzó kiz ashkanaya, nda charap kachingamama misha wanasirpatari tupaxanxapani tusina.

Directora del Proyecto: Patricia Balbuena

Responsable: Hernán Flores

Supervisor: Miguel Alva

Soporte: Frank Flores y Guillermo Sundi



# Charape Izapanimam Ashkana Anu



## Charap Ngichtamam Yarkana Anu

Tsup Juliosh manas chtakchu anush kizaw charape tatsumimam chtakanaya, anomcha tsapoo yarkashinllinaya xapurimun, chuindamun misha paztazimun winguya. Tsapoo yarshinetsi kiz amuyawsincha.

Kizaw yarkatsin nakanaya machtar, palarini misha kabadorni yayansina. Chiríchire puyaramchusin tayachersin kasakanaya mchiroramchu tirupani tusina. Ashiramchusin anmun tsapotsha wing kpekanaya charap karkachu nda xaramama tusina. Tsimbun zaar tushiramchu yusi kanapkanaya tirokatsina, ashiramchu anacha charap ngichtamam waritashtaya. Tsimbun da ashiru zametpa zaar pukanaya kiz yarmarnema, mikeruri iwapapani tusin machiritawa nuwama istanda tanaya, zapaniya yarsini taaru yarkachsin zapanitam wayangche yakanaya.

Tsup agosto misha noviembrish ashiru kiz ichingaru zaar napkatsin yarmarnipi nakanaya ambiri chichir kxongku an puyakatsina, watam karutshuna charap nda ngichtakuwa.



## 2


# Charap Wayangich Tatsumimam Mazache Tachukana Anu



Tsapoo charapem ngichtamam yaramamam chtakchusin mazachetsha wayamam chtakitamsinaya tsup Julio chawpishu da ashiru kachingamchu anshu.

Kiz wazaranchpa nda ashiru machiritpa tsurupam suramam nakanaya manginpi mazache kamnamama. Ashpari iwaparamchusin tsuruppa kamnamam tpotse nuwamasa tayrusin kajonam tinacanaya anush mazach tatsitamama.

Iwaparamchu kajonam tinamam mazachemsha yamam chtakiya pastazimum wingu tputse nuwamasa taychu. Mazache kustarush kukanaya, kapetatachu kajonash tatsitkiya tuwapirini 30 a 35 cm. Tatsitaramchu mazachee kajonash puutam zaar tandapunukiya wingunungi tsurupata 45 a 50 cm tamapari ashiru karaaru kasakiya nayru tatsumimama, napamama misha ksutamamtanta.





# 3

## Charap Glichtakchu Yakana Anu

Charape wayangich yamam chtakanaya tsum agostomanda diciembrish kuskitamta. Kizaw yaramarinipi napkatsin muputuri pik pikish nakanaya. Agostumand yaaru octubrimun ichingaru zaar yaramarnipi napkanaya, aranginacha tsup charap wayangich tsiiparatatu 3 nda ashiru 4 zaar tushiramchu yaramarnipi napkashinllinaya.

Kiz amuyawari yaramarnishi yakanaya, napkusin charap wayangich chcharu anotsi wandaya nda wach paksin yasinpasha nda ashiru wanashirpa kaat kaat ashkusin kuwaa ashkachu anush pakanaya wayangchetsi.

Paramchusin charap ngichtaru ano apinll tawangersin yakanaya.

Charape wayangich wayamam tachtaru bartish tsaap nda ashiru mazach siritkanaya, sherucha anush wayaksha amuy charap yapiritam ngichtakchu wayangich wayarangu ambiritam ashiru wayakanaya, ashpari wayangich wixtamarish ichingachu yusi anmun tsaputam siritkiya nduniya ashiru waar púzawpa pookiya, sherucha comunidadap yushindaksha. Ashpari ambinand ashkanaya.







## Wayangche Tatsumku Anu

# 4

Wayangche yaramchusin pangush wayakanaya 3 nda ashiru 4 zaari ashiriya mbuyamawsha natstamama, yuw mbuyamawa andcha wanasir ituwtaksha.

Kizaw wayangche tsatsumkanaya zaar pukamchu 5 pm nduniya ashiru 6:30 pm, wayanperamchu. Wandaya sin sinakchu kutakanaya mazach puzaymasa tatsumimama tusina.

Minum wixtamar tastumiramchu anmun minomsha wixtamar tatsumimama minum “jeme” tamapari ashiru yusi tawankiya, kuwich zameturich kuwich pakchimashiripich izatangakiya tatsumiramchu anumun yusi minumsha wixtar tatsumimama. Wayangche tatsumiramchi mazachpa tumapkiya tamusustayru kamakiya pamama.



## 5 Wayangche Tatsumiramchu Ksutkana Ano

Napamam chtakiya yuwamandari wayangich tatsumim chtakchu anumandarita. Anomcha kizam kiraak payushinllinaya anush yandamama ini kuzi: 1) fecha wanipshonja tsarap ngichtarang, 2) tamampenja zaram yayrana, 3) wanipanja wayangich wanasir taar, 4) wnipanja wayangich yutaritaw taar, 5) ashpari wayangich wanipanja, 6) fecha wanipshonja tatsumenchina, 7) fecha wanipshonja ituwtarang, 8) wanipanja wiip kchitaw taara, 9) wanip wiip tsipam taara, 10) wanip wayangich kpun taara, ne kuze yandamam nllur secundariash pshtukana ano istanda tanaya. Ne kuze iwaparamchu zangankiya tpots kiraka yasaru anoma, usha anpa kus yandakitamta arangi wanipaja ituwtarng, ashinonja kinapuchtaran, wanipanja kchitaw ituwtarang, ashiranchu aran kiraka masachish tarawachtachich anom yandakiya.

Nipas kiz ichigaru zaar napkiya wayangchirini tatsumirangu anotsi, karuut kxonku anowa puyakiya, ktushtamash katungtapa wayangchiretsi atu napkiya. Wandaya ktushtamash ipataru wayangchirinshi pakchu tawangeru wayangche napkiya yuwa pakuzimawa ano iwaseru kapetkiya shery yuwa wanasirewa ano tumaperu yusi kasakiya.

## Ituwtaramchu Chinuku Ano

6



Charap ituwtakiya tsup noviembrimand chtayaru enerumun kachingiya. Wayangche atsuminamchusin anmun 60 nda ashiru 70 zaar tushiramchu kiz amuyaw tawangersin wayanchirinetsi napkanaya, wandaya wanasir ituwtamaw pakchusin yayrusin pandejash pshtakanaya. Itaru napkusin ituwtamata itasha ndaturi muz tsupasaru ano pakchusin mazachpa yusi tumapkanaya.

Charap wip kchitaw yaryarana ano wayakanaya tres zaari muz shambatemasa tusina, muz shambataramchinacha tawar kajonam tinama anushsha pshtakshinllinaya.





# 7

## Tawar Kajonam Tinayru Anush Wakiya

Tawar kajonam tinaychusin anotssha shiringsha tuwipatssin anpa irutechsin o irutersin anushsha kugnsha kanapkanaya 3 nda ashiru 5 cm tamapari ashiru, ashiramchu anushcha taraw vip muz wanasirew tsupasamawa ano wayaksha.

Charap wip yu musarishini kapetchini ann misha yu tupaxanxachini aano chinuchinow ashikiya kajoshshu dnaturitana papach kurank charapan tupaxanxangints taaru. Charapem wip martakiya sandamar waaru, kungotssha inchigaru zaar nda ashiru tsimbun zaar tushichu kambishtakiya, kung wirsha kamapkiya kajonshu.



## Charape Wip Musash Kapetkana Izapanimama Anu

8

Watam charape izapanipani tusin ne tarawzu chitaranganawa, ashirucha chawpitam muzarishini kapatkashinllinaya izapanimamaya. Ashpari ituwtaramchu simanshuri kapetkanaya musshu. Kiz ichingarusincha yasashinllinaya yuwá kapetchinllina anotsiya, anomcha ipusersin piyam wanitam wayaksha yu tupaxanxama anotsiya yuwapa kapetchu musshu anpataya.

Charape vip kapetkanaya mus Wakappi nda ashiru Wanganpi, watam amb mus kayupchipan nda kaapa nakanawa misha charape wip kachintapa tusin amb watsta kawamama tanawa.



9

## Tupaxanxakana Anu

Tupaxanxamam waritayanchtanda taakchusin kiraka yaramchusin (Guía de transporte de fauna silvestre) ne kiraka comunidad pananda takchu panakiya Programa Regional de manejo de Recurso Rorestal y de Fauna Silvestre (PRMRFFS). Nish kirak yandakiya wanipanja charap wip yakchinllina tupaxanxamama, yaapenja yakchinllina misha chakama tupaxanxanchinllina tusina.






# 10

## Iwaparamchu Napku Ano

ini tarawaz nduntatiya kaapa ashkusin itaru wanasircha yasamama ashiriya charap wanipanja taar izapanayrancheja tusina.

Napkiya tsun noviembrishi nda ashiru diciembrishu, wixtamar yamawa anowa tachkiya, naatusin napkanaya nduniya ashiru kiza amuyawa mashkiya. Ini kuzi watacha: 1) fechatsi, 2) Chakawa yarshini, 3) wanipawa yarshini taar, 4) tsap yarsish yapenja, 5) wanipanja wixtamar yarangana mazachis tatsumimama, 6) wanipa wixtamar shuchim tputse, 7) wanipa wixtamar machi katungarang, y 8) wanipa asshpari wixtamar yarangana. Netsi kuzi kiraka yasamaw yam istakana ansincha natstakshinllinaya ashiriya charap kanituayruni kapetkini ann izapaneyranllenja tusinaya.



**Profonanpe**



[www.profonanpe.org.pe](http://www.profonanpe.org.pe)